

## CUMPANGIA DE IS BARRACELLUS

Sa cumpangia de is barracellus in Barùmini fiat una istituzioni de politzia de satu, nàscia prima de su 1850 e sparèssia me in is annus '70. Custas cumpangias fiant pagadas po assigurai su controllu chi is benis e is proprietadis no benessint arrovinadas e si pigant s'impegnu de torrai contu a chini teniat cancu dannu.

Po custu, segundu su R.D. 14/07/1898, n. 403 (Regolamentu po is cumpangias de barracellus in Sardìnnia), is meris depiant denunciai is benis chi teniant foras de bidda e pagai unu tanti de dinai po tenni diritu a essi rimborsaus si sucediat cancu cosa.

De custu obligu fiant foras de contu is terrenus serraus chi teniant unu custodi a dònna ora. Sa costituzioni de custas cumpangias e àteras regolas apitzus de s'assigurazioni de is terrenus fiant deliberadas de su cunsillu comunali. Segundu su regolamentu bessiu cun su R.D. 14/07/1898, n. 403, dònna cumpangia de barracellus teniat unu meri, unu o duus ufizialis, cancu graduau e barracellus chi serbiant po controllai is benis, segundu su valori chi custos ùrtimus teniant e sa mannesa de su territòriu de su comunu. Sa cumpangia teniat puru unu atuàriu, cun funtzionis de segretàriu, e unu casseri.

De sa L.R. 15/07/1988, n. 15, is membrus de dònna cumpangia no podint essi prus pagu de dexi.